

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкyренцијси савјет

R J E Š E N j E

**po Prijavi namjere koncentracije privrednih subjekata
Aneks d.o.o. Banja Luka i KOMING – PRO d.o.o. Gradiška**

**Sarajevo
mart 2009. godine**



Broj: 01-03-26-054-15-II/08
Sarajevo, 16.03.2009. godine

Na osnovu člana 25. stav (1) tačka e), člana 42. stav (1) tačka d), a u vezi sa čl. 12., 14., 16., 17. i 18. Zakona o konkurenciji („Službeni glasnik BiH“, br. 48/05 i 76/07), rješavajući po Prijavi namjere koncentracije privrednog subjekta Aneks društvo za inženjering i konsalting eksport-import d.o.o. Banja Luka, Majke Jugovića 25, 78000 Banja Luka, Bosna i Hercegovina i privrednog subjekta Društvo za inženjering i promet komunikacione opreme i usluga KOMING – PRO d.o.o. Gradiška, Ulica Vidovdanska b.b, Gradiška, Bosna i Hercegovina, podnesene od strane advokata Seada Miljkovića, Fra Anđela Zvizdovića 1, 71000 Sarajevo, zaprimljenu dana 22.12.2008. godine pod brojem: 01-03-26-054-II/08, Konkurencijsko vijeće, na 85. (osamdesetpetoj) sjednici održanoj dana 16.03.2009. godine, je donijelo

R J E Š E N J E

1. Ocjenjuje se dopuštenom koncentracija na tržištu Internet usluga (dial up i broadband internet) u regijama Banja Luka i Prijedor i tržištu pružanja usluga kablovske distribucije radio i televizijskog programa u općinama Banja Luka, Laktaši i Gradiška, koja će nastati sticanjem kontrole kupovinom osnovnih sredstava u privrednom subjektu Društvo za inženjering i promet komunikacione opreme i usluga KOMING – PRO d.o.o. Gradiška Ulica Vidovdanska b.b, Gradiška, Bosna i Hercegovina, od strane privrednog subjekta Aneks društvo za inženjering i konsalting eksport-import d.o.o. Banja Luka, Majke Jugovića 25, 78000 Banja Luka, Bosna i Hercegovina.
2. Zbog dostavljanja netačnih informacija u postupku ocjene koncentracije u smislu člana 17. Zakona o konkurenciji, izriče se novčana kazna privrednom subjektu Aneks d.o.o. Banja Luka u iznosu od 15.000,00 KM i odgovornom licu, direktoru Antonijević Nebojši, novčanu kaznu u iznosu od 5.000,00 KM, u smislu člana 49. stav (1) tačka c) i stav (2) Zakona o konkurenciji, koju su dužni platiti u roku od 8 (osam) dana od dostavljanja Rješenja.
3. Ovo Rješenje o koncentraciji se upisuje u Registar koncentracija.
4. Ovo Rješenje je konačno i bit će objavljeno u „Službenom glasniku BiH“, službenim glasilnicima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je dana 22.12.2008. godine pod brojem: 01-03-26-054-II/08, zaprimilo Prijavu namjere koncentracije (u daljem tekstu: Prijava) privrednog subjekta Aneks društvo za inženjering i konsalting eksport-import, d.o.o. Banja Luka, Majke Jugovića 25, 78000 Banja Luka, Bosna i Hercegovina (u daljem tekstu: Podnosilac prijave ili Aneks d.o.o. Banja Luka), podnesenu od strane ovlaštenog zastupnika advokata Seada Miljkovića, Fra Anđela Zvizdovića 1, 71000 Sarajevo (punomoć izdata u Banja Luci dana 15.12.2008. godine), kojom privredni subjekt Aneks d.o.o. Banja Luka namjerava steći kontrolu nad osnovnim sredstvima privrednog subjekta Društvo za inženjering i promet komunikacione opreme i usluga KOMING – PRO d.o.o. Gradiška Ulica Vidovdanska b.b, Gradiška, Bosna i Hercegovina (u daljem tekstu: KOMING – PRO).

Uvidom u podnesenu Prijavu utvrđeno je da ista nije potpuna i kompletna, u smislu člana 30. stav (1) Zakona o konkurenciji (u daljem tekstu: Zakon) i čl. 8., 9. i 10. Odluke o načinu podnošenja prijave i kriterijumima za ocjenu koncentracija privrednih subjekata („Službeni glasnik BiH“, broj 95/06), te je u skladu sa članom 31. Zakona Konkurencijsko vijeće zatražilo dopunu iste dana 07.01.2009. godine dopisom broj: 01-03-26-054-1-II/08, dana 22.01.2009. godine dopisom broj: 01-03-26-054-3-II/08 i dana 03.02.2009. godine dopisom broj: 01-03-26-054-8-II/08. Podnosilac prijave je u skladu sa zahtjevima Konkurencijskog vijeća dopunio Prijavu traženom dokumentacijom dana 14.01.2009. godine dopisom broj 01-03-26-054-2-II/08, dana 30.01.2009. godine dopisom broj 01-03-26-054-7-II/08, dana 12.02.2009. godine dopisom broj 01-03-26-054-9-II/08 i dana 04.03.2009. godine dopisom broj 01-03-26-054-13-II/08.

Po prijemu tražene dokumentacije Konkurencijsko vijeće je utvrdilo Prijavu kompletnom i dana 17.02.2009. godine izdalo Potvrdu o prijemu kompletne i uredne Prijave broj: 01-03-26-054-10-II/08, u skladu sa članom 30. stav (3) Zakona.

Podnosilac Prijave je naveo da, u smislu člana 30. stav (2) Zakona, nema obavezu podnijeti zahtjev za ocjenu koncentracije nekom drugom tijelu ovlaštenom za ocjenu koncentracije izvan teritorije Bosne i Hercegovine.

Konkurencijsko vijeće u postupku ocjene dopuštenosti koncentracije je utvrdilo sljedeće činjenice:

Prijava namjere koncentracije je podnesena u zakonom propisanom roku, u smislu člana 16. stav (1) Zakona.

1. Učesnici koncentracije

Učesnici koncentracije su privredni subjekt Aneks društvo za inženjering i konsalting eksport-import d.o.o. Banja Luka, Majke Jugovića 25, 78000 Banja Luka, Bosna i Hercegovina i privredni subjekt Društvo za inženjering i promet komunikacione opreme i usluga KOMING – PRO d.o.o. Gradiška Ulica Vidovdanska b.b, Gradiška, Bosna i Hercegovina.

1.1. Privredni subjekt Aneks d.o.o. Banja Luka

Privredni subjekt Aneks društvo za inženjering i konsalting eksport-import d.o.o. Banja Luka, Majke Jugovića 25, 78000 Banja Luka, osnovan je 1993. godine i registrovan u Osnovnom sudu u Banja Luci, pod brojem: 1-3645-00.

Pretežne djelatnosti privrednog subjekta Aneks d.o.o. Banja Luka su trgovina na veliko računarima, perifernom opremom i softverom, izrada softvera, ostale srodne računarske djelatnosti i pružanje usluga iz oblasti telekomunikacija, fiksne telefonske usluge i pružanje internet usluga.

U osnovnom kapitalu privrednog subjekta Aneks d.o.o. Banja Luka 70,0% udjela ima privredni subjekt Telekom Slovenije d.d. Ljubljana, Cigaletova 15, 1000 Ljubljana, Republika Slovenija (u daljem tekstu: Telekom Slovenije) i 30,0% udjela fizičko lice Nebojša Antonijević ((..)*¹Banja Luka, (..)*).

Djelatnosti privrednog subjekta Telekom Slovenije su pružanje usluga u oblasti telekomunikacija koja obuhvata usluge fiksne i mobilne telefonije, internet usluge, obradu podataka i distribuciju kablovskog interneta.

¹ (..)* - podaci predstavljaju poslovnu tajnu

Privredni subjekt Aneks d.o.o. Banja Luka od strane Regulatorne agencije za komunikacije BiH (u daljem tekstu: RAK) ima izdatu dana 01. aprila 2002. godine Opštu dozvolu za pružanje internet usluga na cijeloj teritoriji BiH (broj: DPIU-TS/001/02), dana 12. aprila 2006. godine dozvolu mrežnog operatora, te dozvolu za pružanje usluga u javnoj fiksnoj telefoniji od 08. maja 2006. godine.

Privredni subjekt Aneks d.o.o. Banja Luka prodaju računarske opreme i pretplate za dial up i broadband internet obavlja u svom sjedištu, a prodaju ostalih telekomunikacijskih usluga obavlja kanalima direktne prodaje.

1.1.1. Povezani privredni subjekti Aneks d.o.o. Banja Luka u Bosni i Hercegovini

Privredni subjekt Aneks d.o.o. Banja Luka je 100,0% vlasnik privrednog subjekta NETKOM društvo sa ograničenom odgovornošću za inženjering, usluge proizvodnje i trgovinu (u daljem tekstu: Netkom d.o.o. Banja Luka), Ranka Šipke 78, 78000 Banja Luka, registrovanog u sudskom registru Osnovnog suda u Banja Luci pod brojem 1-12729-00.

Osnovna djelatnost privrednog subjekta Netkom d.o.o. Banja Luka je pružanje usluga u oblasti telekomunikacija (kablovska distribucija radio i televizijskih programa).

Rješenjem Konkurencijskog vijeća broj: 01-06-26-021-5-II/08 od 24.07.2008. godine ocijenjena je dopuštenom koncentracija.

Telekom Slovenije postao je 100,0% vlasnik privrednog subjekta Blic.Net d.o.o. Banja Luka, čija je osnovna djelatnost pružanje Internet usluga (Rješenje Konkurencijskog vijeća broj: 01-02-26-039-3-II/08 od 30.01.2008. godine), a nakon čega je izvršeno pripajanje privrednog subjekta Blic.Net d.o.o. Banja Luka privrednom subjektu Aneks d.o.o. Banja Luka i dana 02.07.2008. godine isto je registrovano u Osnovnom sudu u Banja Luci.

Privredni subjekt Aneks d.o.o. Banja Luka ima većinsku kontrolu nad osnovnim sredstvima privrednog subjekta Profel – komunikacije d.o.o. preduzeće za izradu i održavanje komunikacionih sistema, Petra Petrovića Njogoša 12/a, 79000 Prijedor (u daljem tekstu: Profel – komunikacije d.o.o. Prijedor), registrovanom u Osnovnom sudu u Banja Luci, pod brojem: 1-15145-00, dana 11. oktobra 2005. godine,

Pretežna djelatnost privrednog subjekta Profel – komunikacije d.o.o. Prijedor je pružanje usluga iz sektora telekomunikacija (kablovska distribucija radio i televizijskih programa).

Rješenjem Konkurencijskog vijeća broj: 01-06-26-045-10-II/08 od 13.01.2009. godine dopuštena je predmetna koncentracija.

Privredni subjekt Aneks d.o.o. Banja Luka ima većinsku kontrolu nad osnovnim sredstvima privrednog subjekta Ki sistemi – Kompjuterski inženjering, društvo sa ograničenom odgovornošću, sa sjedištem u Prijedoru, Kralja Petra I Oslobođioca 98 (u daljem tekstu: Ki sistemi – Kompjuterski inženjering d.o.o. Prijedor), registrovano dana 01.08.1998. godine u Osnovnom sudu u Banja Luci, registarski uložak broj 1-10448-00.

Pretežna djelatnost privrednog subjekta Ki sistemi – Kompjuterski inženjering d.o.o. Prijedor trgovina na veliko računarima, perifernom opremom i softverom, izrada softvera i pružanje usluga iz oblasti telekomunikacije (internet usluge).

Rješenjem Konkurencijskog vijeća broj: 01-05-26-044-12-II/08 od 11.02.2009. godine dopuštena je predmetna koncentracija.

1.2. Privredni subjekt Društvo za inženjering i promet komunikacione opreme i usluga KOMING – PRO d.o.o. Gradiška

Učesnik koncentracije Društvo za inženjering i promet komunikacione opreme i usluga „KOMING – PRO“ d.o.o. Gradiška Ulica Vidovdanska b.b, Gradiška, osnovan 07.05.2001. godine, je registrovan u Osnovnom sudu u Banja Luci pod brojem 1-12082-00. U 100% vlasništvu je fizičkog lica Danila Vujat ((..)*,(..)* , Gradiška).

Pretežne registrovane djelatnosti privrednog subjekta KOMING-PRO su pružanje usluga inženjeringa u oblasti telekomunikacija i srodnih usluga, kablovska distribucija radio i televizijskog programa, pružanje Internet usluga i integracija informacionih sistema.

Za usluge pružanja kablovske distribucije radio i televizijskog programa posjeduje Opštu dozvolu za Javnog mrežnog operatera No. DMOL-TS/047/03, a za pružanje Internet usluga posjeduje Opštu dozvolu za pružanje Internet usluga No. DPIU-TS/040/04 izdane od RAK-a.

Privredni subjekt KOMING-PRO pojedinačno ili zajedno nema više od 10,0% udjela u osnovnom kapitalu, odnosno 10,0% prava glasa u nekom privrednom subjektu u Bosni i Hercegovini.

2. Obaveza prijave namjere koncentracije

Obaveza prijave namjere koncentracije privrednih subjekata, u smislu odredbe člana 14. stav (1) Zakona, postoji ako ukupni godišnji prihodi učesnika koncentracije ostvareni prodajom roba i/ili usluga na svjetskom tržištu iznose preko 100.000.000,00 KM, po završnom računu u godini koja je prethodila koncentraciji.

Ukupni godišnji prihodi privrednih subjekata učesnika koncentracije (i njihovih povezanih privrednih subjekata), na dan 31. decembar 2007. godine, prikazani su u Tabeli 1.

Tabela 1.

(KM)	Telekom Slovenije	Aneks d.o.o. Banja Luka	Blic.Net	Netkom d.o.o. Banja Luka	KOMING-PRO
Svijet	(..)*	(..)*	(..)*	(..)*	(..)*
Bosna i Hercegovina	(..)*	(..)*	(..)*	(..)*	(..)*

Konkurencijsko vijeće je prilikom utvrđivanja ukupnog godišnjeg prihoda učesnika koncentracije uzelo u obzir i godišnji prihod u iznosu od (..)*KM privrednog subjekta Telekom Slovenije, kao većinskog vlasnika privrednog subjekta Aneks d.o.o. Banja Luka sa godišnjim ukupnim prihodom od (..)*KM, a privredni subjekt KOMING-PRO ostvario je ukupan prihod u iznosu od (..)*KM, po završnom računu u godini koja je prethodila koncentraciji.

Budući da su učesnici koncentracije ispunili uslove u pogledu zajedničkog ukupnog godišnjeg prihoda i da je najmanje jedan privredni subjekt učesnik koncentracije registrovan na teritoriji Bosne i Hercegovine, u smislu člana 14. stav (1) Zakona, bili su obavezni podnijeti Prijavu.

3. Pravni okvir ocjene koncentracije

Konkurencijsko vijeće je u provođenju postupka ocjene dopuštenosti koncentracije primjenilo odredbe Zakona, Odluke o utvrđivanju relevantnog tržišta („Službeni glasnik BiH“, broj 18/06), te Odluke o

načinu podnošenja prijave i kriterijumima za ocjenu koncentracija privrednih subjekata (Službeni glasnik BiH“, broj 95/06).

4. Pravni osnov i oblik koncentracije

Privredni subjekti Aneks d.o.o. Banja Luka i KOMING-PRO su, dana 12.12.2008. godine u Banja Luci, zaključili Ugovor o kupoprodaji osnovnih sredstava (u daljem tekstu: Ugovor), kojim privredni subjekt Aneks d.o.o. Banja Luka namjerava steći kontrolu nad osnovnim sredstvima privrednog subjekta KOMING-PRO.

Ugovorom privredni subjekt Aneks namjerava steći vlasništvo nad osnovnim sredstvima privrednog subjekta KOMING-PRO, odnosno infrastrukturu (kablovi, cijevi, šahtovi i sl.) po kupoprodajnoj cijeni od (...)KM.

Navedenim Ugovorom se ne stiče vlasnički udio nad privrednim subjektom KOMING-PRO, već samo vlasništvo nad njegovim osnovnim sredstvima putem kojih je privredni subjekt KOMING-PRO obavljao pružanja Internet usluga i usluga distribucije radio i televizijskog programa.

Slijedom navedenog, namjeravana koncentracija podrazumijeva sticanje kontrole od strane jednog privrednog subjekta (Aneks d.o.o. Banja Luka) nad dijelom drugog privrednog subjekta (KOMING-PRO), u skladu sa članom 12. stav (1) tačka b) pod 1) Zakona.

5. Relevantna tržišta koncentracije

Relevantno tržište, u smislu člana 3. Zakona, te čl. 4., 5. i 6. Odluke o utvrđivanju relevantnog tržišta, čini tržište određenih proizvoda (usluga) koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvata sve proizvode i/ili usluge koje potrošači smatraju međusobno zamjenjivim s obzirom na njihove bitne karakteristike, kvalitet, namjenu, cijenu ili način upotrebe.

Prema članu 5. Odluke o utvrđivanju relevantnog tržišta relevantno tržište u geografskom smislu obuhvata cijelu ili dio teritorije Bosne i Hercegovine, na kojoj su tržišni konkurenti aktivni u prodaji i/ili kupovini relevantnog proizvoda pod jednakim ili dovoljno ujednačenim uslovima koje to tržište bitno razlikuje od uslova tržišne konkurencije na susjednim geografskim tržištima.

Obzirom na navedeno, a na osnovu provedene analize relevantnih tržišta učesnika koncentracije Konkurencijsko vijeće je utvrdilo da postoje dva relevantna tržišta proizvoda/usluga koncentracije i to tržište Internet usluga (dial up i broadband internet) i tržište pružanje usluga kablovske distribucije radio i televizijskog programa.

Relevantnim tržištem u geografskom smislu za pružanje Internet usluga smatraju se regije Banja Luke i Prijedora s obzirom da privredni subjekt Aneks d.o.o. Banja Luka, zajedno sa svojim povezanim privrednim subjektima Blic.Net d.o.o. Banja Luka i Ki sistemi – Kompjuterski inženjering d.o.o. Prijedor, pruža Internet usluge samo na regijama Banja Luka i Prijedor, a učesnik koncentracije KOMING-PRO samo u općini Gradiška, koja je u sastavu regije Banja Luka.

Relevantnim tržištem u geografskom smislu za pružanje usluga kablovske distribucije radio i televizijskog programa smatraju se općine Banja Luka, Laktaši i Gradiška. Prilikom utvrđivanja relevantnog geografskog tržišta Konkurencijsko vijeće je uzelo u obzir da je privredni subjekt Telekom Slovenija na relevantnom tržištu proizvoda/usluga pružanje usluga kablovske distribucije radio i televizijskog programa

prisutan preko povezanog privrednog subjekta Netkom d.o.o. Banja Luka koji djeluje u općinama Kotor Varoš, Čelinac i Banja Luka, u skladu sa uslovima utvrđenim u dozvolama odobrenim od RAK-a.

Preko povezanog privrednog subjekta Profel – komunikacije d.o.o. Prijedor, koji posjeduje Opću dozvolu za javnog mrežnog operatora i Dozvolu za pružanje usluga kablovske distribucije radio i televizijskog programa od RAK-a, na osnovu kojih je istom omogućeno pružanje usluge kablovske distribuciju radio i televizijskog programa u općinama Prijedor, Banja Luka, Sanski Most iako trenutno djeluje samo na relevantnom tržištu općine Prijedor.

Privredni subjekt KOMING-PRO usluge kablovske distribucije radio i televizijskih programa pruža samo na područje općine Gradiška (gdje je ujedno i jedini pružalac ovih usluga), iako ima opću dozvolu za javnog mrežnog operatora za općine Banja Luka, Laktaši i Gradiška.

Slijedom gore navedenog, relevantnim tržištem koncentracije smatraju se tržišta Internet usluga (dial up i broadband internet) u regijama Banja Luka i Prijedor i usluga kablovske distribucije radio i televizijskog programa u općinama Banja Luka, Laktaši i Gradiška.

6. Analiza relevantnih tržišta koncentracije u Bosni i Hercegovini

U analizi relevantnih tržišta učesnika koncentracije i njihovih glavnih konkurenata, kao i procjenama tržišnih udjela korišteni su kao relevantni podaci dostavljeni od Regulatorne agencije za komunikacije Bosne i Hercegovine (u daljem tekstu: RAK) i podaci Podnosioca prijave.

6.1. Analiza tržišta Internet usluga (dial up i broadband Internet)

U skladu sa podacima dobijenim od RAK-a zaključno sa 31.12.2007. godine u Bosni i Hercegovini bilo je registrovano 60 davalaca Internet usluga, sa ukupnim brojem Internet pretplatnika od 273.752 u Bosni i Hercegovini.

Tržišni udjeli privrednog subjekta Aneks d.o.o. Banja Luka (i povezanih privrednih subjekta) i privrednog subjekta KOMING PRO i njihovih konkurenata na relevantnom tržištu Internet usluga, u 2007. godini, iznosili su:

Tabela 2.

R.b.	Privredni subjekt	Regija Banja Luka		Regija Prijedor	
		%	Broj Internet pretplatnika	%	Broj Internet pretplatnika
1.	Blic.Net d.o.o. Banja Luka	36,6	22.238	-	-
2.	Telekomunikacije RS a.d. Banja Luka – Telekom Srpske	24,5	14.863	30,9	2.160
3.	Lanaco kompjuteri & komunikacije, Banja Luka	10,0	6.063	0,6	44
4.	Aneks d.o.o. Banja Luka	8,1	4.930	-	-
5.	Preduzeće za poštanski saobraćaj RS-Spinter, Banja Luka	7,5	4.534	31,6	2.210
6.	Ki Sistemi d.o.o. Prijedor	-	-	35,7	2.500
7.	KOMING PRO	1,3	772	-	-
8.	Ostali	12,0	7.373	1,2	84
	Ukupno	100,0	60.773	100,0	6.998
	Ukupno (1+4+6+7)	46,0	27.940	35,7	2.500

Izvor: podaci RAK-a

Prema podacima RAK-a, privredni subjekt Aneks d.o.o. Banja Luka zajedno sa svojim povezanim privrednim subjektima prisutan je samo na regiji Banja Luka (koja obuhvata gradove: Banja Luka, Srbac,

Čelinac, Kotor Varoš, Kneževo, Gradiška, Prnjavor i Laktaši) i imao je u 2007. godini ukupno 27.168 Internet pretplatnika, dok je privredni subjekt KOMING PRO imao 772 Internet pretplatnika.

Privredni subjekt Ki sistemi d.o.o. Prijedor djeluje isključivo na regiji Prijedor (koja obuhvata gradove: Prijedor, Kozarska Dubica, Novi Grad i Kostajnica) i imao ukupno 2.500 Internet pretplatnika.

Slijedom navedenog, pri procjeni predmetne koncentracije Konkurencijsko vijeće se koristilo kriterijima i standardima EZ Smjernicama za ocjenu horizontalne koncentracije (OJ 2004/C31/03). To se, prije svega, odnosi na Herfindahl-Hirschmanov indeks (HHI) kojim se određuje omjer između ukupnog broja privrednih subjekata koji djeluju na relevantnom tržištu i njihove relativne veličine izražene u postotku tržišnog udjela na tom tržištu.

Analizom HHI indeksa prije provođenja koncentracije i poslije provođenja koncentracije Konkurencijsko vijeće je procijenilo da je tržište Internet usluga u regijama Banja Luka i Prijedor u 2007. godini bilo slabo koncentrisano. Na taj način utvrđeno je da provođenje predmetne koncentracije neće imati značajnih negativnih učinaka na tržištu Internet usluga.

6.2. Analiza tržišta pružanje usluga kablovske distribucije radio i televizijskog programa

Prema podacima Podnosioca prijave, a koji se pozivaju na podatke Asocijacije Kablovskih Operatera i Distributera Bosne i Hercegovine – AKOP, u Bosni i Hercegovini je bilo ukupno 210.000 pretplatnika kablovske distribucije radio i televizijskih programa u 2007. godini.

U skladu sa podacima iz javnog registra korisnika dozvola RAK-a u Bosni i Hercegovini ima 74 korisnika dozvole javnog mrežnog operatera, a njih 58 ima ujedno i dozvole za pružanje usluga kablovske distribucije radio i televizijskog programa. Ukupno 12 privrednih subjekata posjeduje nacionalnu dozvolu (koja omogućuje izgradnju infrastrukture na cijeloj teritoriji Bosne i Hercegovine).

Prema podacima Podnosioca prijave privredni subjekt Aneks d.o.o. Banja Luka zajedno sa povezanim privrednim subjektom Netkom d.o.o. Banja Luka, koji ima Opću dozvolu za javnog mrežnog operatera za općine Banja Luka, Čelinac i Kotor Varoš je imao ukupno 5.500 pretplatnika u 2007. godini, dok preko povezanog privrednog subjekta Profel – komunikacije d.o.o. Prijedor, koji ima Opću dozvolu za javnog mrežnog operatera za općine Prijedor, Banja Luka i Sanski Most djeluje samo na relevantnom tržištu općine Prijedor.

Tržišni udjeli privrednog subjekta Aneks d.o.o. Banja Luka (putem povezanog privrednog subjekta Netkom d.o.o Banja Luka), i konkurenata na relevantnom tržištu pružanja usluga kablovske distribucije radio i televizijskog programa, u 2007. godini, iznose:

Tabela 3.

Općina	Netkom d.o.o Banja Luka (%)	KOMING PRO (%)	Profel Komunikacije d.o.o. Prijedor (%)	Elta kabl Banja Luka (%)	Eling-KDS Teslić (%)	Ukupno (%)
Banja Luka	35,0	-	-	65,0	-	100,0
Laktaši	-	-	-	-	-	-
Gradiška	-	100,0	-	-	-	100,0

Podaci iz Prijave

Prema podacima iz Prijave privredni subjekt KOMING PRO u 2007. godini je djelovao samo u općini Gradiška (gdje je ujedno i jedini pružalac ovih usluga), a nema djelovanja u općinama Banja Luka i Laktaši i ima 2.300 pretplatnika na tržištu kablovske distribucije radio i televizijskih programa.

7. Ocjena koncentracije

Konkurencijsko vijeće je, nakon procjene i analize podataka i utvrđenih činjenica u smislu člana 17. Zakona, u postupku donošenja Rješenja, ocijenilo da će provođenjem koncentracije na relevantnom tržištu pružanja Internet usluga doći do povećanja tržišnog udjela u regiji Banja Luka i Prijedor iako privredni subjekt Aneks d.o.o. Banja Luka (odnosno Telekom Slovenije) do sada nije djelovao u općini Gradiška ali da ista neće uticati na sprječavanje, ograničavanje ili narušavanje tržišne konkurencije na relevantnom tržištu pružanja Internet usluga budući da na istom tržištu djeluje veći broj tržišnih konkurenata sa značajnijim tržišnim udjelom (Telekomunikacije RS a.d. Banja Luka – Telekom Srpske i Lanaco kompjuteri & komunikacije, Banja Luka).

Osim toga, analizom podataka broja Internet pretplatnika u 2008. godini na relevantnom geografskom tržištu primjećeno je da nije došlo do povećanja tržišnih udjela učesnika koncentracije i da je istovremeno došlo do povećanje tržišnih udjela njihovih konkurenata.

U tom smislu, očekuje se da će predmetna koncentracije osigurati dalje jačanje konkurencije na tržištu Internet usluga u regijama Banja Luka i Prijedor kao i dalje poboljšanje kvaliteta u pružanju Internet usluga (uspostavljanje platforme za dalje proširenje pružanja usluga u oblasti pružanja Internet usluga, visoka pouzdanost isporuke usluga itd).

U postupku donošenja Rješenja Konkurencijsko vijeće je utvrdilo da neće doći do povećanja tržišnog udjela od strane privrednog subjekta Aneks d.o.o. Banja Luka na relevantnom tržištu pružanja usluga kablovske distribucije radio i televizijskih programa u općinama Banja Luka, Laktaši i Gradiška budući da je privredni subjekt KOMING PRO prisutan samo na području općine Gradiška na kojoj privredni subjekt Aneks d.o.o. Banja Luka do sada nije pružao usluge kablovske distribucije radio i televizijskih programa.

Uzimajući u obzir sve iznesene činjenice i podatke koji su prethodili donošenju Rješenja, Konkurencijsko vijeće je ocijenilo koncentraciju dopuštenom, u smislu člana 18. stav (2) tačka a) Zakona, kao što je odlučeno u dispozitivu ovog Rješenja.

8. Novčana kazna

Zakonom i Odlukom o načinu podnošenja prijave i kriterijumima za ocjenu koncentracija privrednih subjekata podaci koji se dostavljaju Konkurencijskom vijeću moraju biti tačni, a Konkurencijsko vijeće samo na osnovu tačnih podataka, može odrediti tržišne udjele učesnika koncentracije, koji predstavljaju odlučujuće elemente za analizu relevantnog tržišta i ocjenu dopuštenosti koncentracije.

Privredni subjekt Aneks d.o.o. Banja Luka je u Prijavi, a kasnije i u dopuna Prijave naveo da je zajedno sa povezanim privrednim subjektom Blic.Net d.o.o. Banja Luka u 2007. godini imao ukupno 8.160 Internet pretplatnika (od čega je privredni subjekt Aneks d.o.o. Banja Luka imao 160 Internet pretplatnika, a privredni subjekt Blic.Net d.o.o. Banja Luka 8000 Internet pretplatnika), a privredni subjekt KOMING PRO ukupno 772 Internet pretplatnika, što odgovara podacima dostavljenim od strane RAK-a.

Konkurencijsko vijeće, u cilju provjere dostavljenih podataka u Prijavi, zatražilo je od RAK-a, broj Internet pretplatnika za učesnike koncentracije i njihove konkurenate za 2007. godinu.

Prema podacima RAK-a (koji je isti dobio od privrednog subjekta Aneks d.o.o. Banja Luka, u redovnoj godišnjoj anketi za 2007. godinu), privredni subjekt Aneks d.o.o. Banja Luka je zajedno sa svojim povezanim privrednim subjektom Blic.Net d.o.o. Banja Luka u 2007. godini imao ukupno 27.168 internet pretplatnika (od čega privredni subjekt Aneks d.o.o. Banja Luka 4.930 Internet pretplatnika, a privredni subjekt Blic.Net d.o.o. Banja Luka 22.238 Internet pretplatnika).

Slijedom navedenog, privredni subjekt Aneks d.o.o. Banja Luka u Prijavi, a kasnije i u dopuni Prijave naveo netačne podatke o broju Internet pretplatnika učesnika koncentracije za 2007. godinu, koji se znatno razlikuju od zvaničnih podataka RAK-a.

Obzirom da je Podnosilac prijave dostavio netačne podatke, Konkurencijsko vijeće je na osnovu člana 49. stav (1) tačka c) i stav (2) Zakona izreklo novčanu kaznu privrednom subjektu Aneks d.o.o. Banja Luka u iznosu od 15.000,00 KM, što predstavlja oko 0,1% od ukupnog godišnjeg prihoda iz 2007. godine, i odgovornom licu, direktoru Antonijević Nebojši, novčanu kaznu u iznosu od 5.000,00 KM.

Konkurencijsko vijeće je odredilo novčanu kaznu imajući u vidu činjenicu da kažnjavanje Podnosioca prijave nije prvenstven cilj, već izrečena novčana kazna ima za cilj upozoriti na obavezu primjene Zakona.

9. Administrativna taksa

Podnosilac Prijave na ovo Rješenje, u skladu sa članom 2. stav (1) tarifni broj 107. tačka d) pod 1) Odluke o administrativnim taksama u vezi sa procesnim radnjama pred Konkurencijskim vijećem („Službeni glasnik BiH“, broj 30/06) je dužan platiti administrativnu taksu u ukupnom iznosu od 2.500,00 KM u korist Budžeta institucija Bosne i Hercegovine.

10. Pouka o pravnom lijeku

Protiv ovoga Rješenja nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objavljivanja ovog Rješenja.

Predsjednik

Ibrica Lakišić